

摘藻堂四庫全書薈要

集部

欽定四庫全書薈要

集部
宋詩鈔卷十九



詳校官候選知縣臣吳嗣華

欽定四庫全書薈要卷二萬二百七十二

集部

宋詩鈔卷十九

內閣中書舍人吳之振編

安石臨川詩鈔下

送鄧監簿南歸

不見驪塘路茫然四十春長為異鄉客每憶故時人水
閣公三世雲浮我一身濠梁送歸處握手但悲辛

即事

徑暖草如積山晴花更繁縱橫一川水高下數家村靜
憩雞鳴午荒尋犬吠昏歸來向人說疑是武陵源

示耿天隲

挾策能傷性捐書可盡年弦歌無舊習香火有新緣白
土長岡路朱湖小洞天望公時顧我於此暢幽悃

北山暮歸示道人

千山復萬山行路有無間花發蜂遞繞果垂猿對攀獨
尋寒水度欲趁夕陽還天黑月未上兒童初掩關

烏塘

地僻居人少山稠伏獸多
怒狸朝搏雁嚙虎夜窺籬
落生孫竹門庭上女蘿未應悲寂寞六載一經過

欲歸

水漾青天暖沙吹白日陰
塞垣春錯莫行路老侵尋
綠稍還幽草紅應動故林
留連一杯酒滿眼欲歸心

壬辰寒食

客思似楊柳春風千萬條
更傾寒食淚欲漲冶城潮
巾

髮雪爭出鏡顏朱
早凋未知軒冕樂
但欲老漁樵

宿雨

綠攬寒蕪出紅爭暖樹歸
魚吹塘水動雁拂塞垣飛
宿雨驚沙盡晴雲晝漏稀
却愁春夢短燈火著征衣

題友人郊居水軒

田中三畝宅水上一軒開
為有漁樵樂非無仕進媒
槎頭收晚釣荷葉卷新醅
坐說魚腴美功名挽不來

江亭晚眺

日下崦嵫外秋生沆碭間清江無限好白鳥不勝閒
雨過雲收嶺天空月上灣歸鞍侵調角回首六朝山

自白上村入北寺二首

木杪田家出城陰野逕分溜渠行碧玉畦稼卧黃雲薄
槿胭脂染深荷水麝焚夕陽人不見雞鶩自成羣

雨過百泉出秋聲連衆山獨尋飛鳥外時渡亂流間坐
石偶成歇看雲相與還會須營一畝長此聽潺湲

題朱郎中白都莊

蕭灑桐廬守滄洲寄一廬山光隔釣岸江氣雜炊煙藜
杖聽鳴鶻籃輿看種田明時須共理此興在他年

次韻沖卿過睢陽

宮廟此神鄉留親泊楚艤天開今壯麗地積古悲涼不
改山河舊猶餘草木荒還聞足賓客誰是漢鄒陽

崑山慧聚寺次張祐韻

峰嶺互出沒江湖相吐吞園林浮海角臺殿擁山根百
里見漁艇萬家藏水村地偏來客少幽興祇桑門

吳江

莽莽昔登臨，秋風一散襟。
地留孤嶼小，天入五湖深。
柑橘無千里，魚鰕有萬金。
吾雖輕范蠡，終欲此幽尋。

世事

世事一何稠，論心日已偷。
尚蒙今士笑，宜見古人羞。
老圃聊須問，良田亦欲求。
非關畏黻冕，無責易身修。

寄純甫

塞上無花草，飄風急我歸。
捎林聽澗落，卷土看雲飛。
想

子當紅葉思家上翠微江寒亦未已好好着春衣

招丁元珍

默默不自得紛紛何所為
畫墁聊取食獵較且隨時
秋入江湖暗風生草樹悲
黃花一杯酒思與故人持

江上二首

潮連風浩蕩沙引客淹留
落日更清坐空江無近舟
共看蒹葭宅聊即稻粱謀
未敢嗟艱食凶年半九州

書自江邊使鄉隣病餓稠
何言萬里客更作百身憂
補

敗今誰卹趨生我自羞西南雙病眼落日倚扁舟

暮春

春期行晚晚春意賸芳菲曲水應修楔披香未試衣
雨花紅半墮煙樹碧相依悵望夢中地王孫底不歸

送鄆州知府宋諫議

盛世千齡合宗工四海瞻天心初籲俊雲翼首離潛德
望完圭角儀形壯陞廉徐鳴蒼玉佩盡校碧牙籤綸掖
清光注鑿坡茂渥霑文明誠得主政瘼尚煩砭右府參

機務東塗贊景炎廟謨資石畫兵畧倚珠鈐坐鎮均勞
逸齋居養智恬謳謠喧井邑惠化穆蒼黔進律朝章舊
疏恩物議僉通班三殿遠徙部十城兼申甫周之翰龜
蒙魯所詹地靈奎宿照野沃汶河漸首路龍旗盛提封
虎節嚴賜衣纏紫艾衛甲綴朱綬海谷移文省谿堂燕
巨添班春回紺幘問俗卷彤檐舟楫商巖命熊罷渭水
占治裝行入覲金鼎重調鹽

歲晚懷古

先生歲晚事田園魯叟遺書廢討論問訊桑麻憐已長
按行松菊喜猶存農人調笑追尋壑稚子歡呼出候門
遙謝載醪祛惑者吾今欲辨已忘言

段氏園亭

欹眠隨水轉東垣一點炊煙映水昏漫漫芙蓉難覓路
脩脩楊柳獨知門青山呈露新如染白鳥嬉游靜不煩
朱雀航邊今有此可能搖蕩武陵源

次韻致遠木人洲

迷子山前漲一洲
木人圖志失編收
年多但有柳生肘
地僻獨無茅蓋頭
河側鮑生乾尚立
江邊屈子槁將投
未妨他日稱居士
能使君疑福可求

次韻酬龔深甫

握手東岡雪滿筵
後期惆悵老吳蠶
芳辰一笑真難值
暮齒相思豈久堪
他日杜詩傳渭北
幾時周宅對漳南
百年邂逅能多少
且可勤來共草菴

次韻酬朱昌叔三首

點也自殊由與求既成春服更何憂拙於人合且天合
靜與道謀非食謀未愛京師傳谷口但知鄉里勝壺頭
嗟予老矣無一事復得此君相與遊

去年音問隔淮州百謫難知亦我憂前日杯盤共江渚
一歡相屬豈人謀山蟠直瀆輸淮口水抱長干轉石頭
乘興舟輿無不可春風從此與公遊

烏榜登臨興未休共言何許更消憂聯裾蕭寺尋真覺
方駕孫陵弔仲謀語罷每開歡笑口詩來仍掉苦吟頭

已知軒冕真吾累且可追隨馬少游

次韻送程給事知越州

千騎東方占上頭如何誤到北山遊
清明若覩蘭亭月暖熱因忘蕙帳秋
投老始知歡可惜通宵豫以別為憂
西歸定有詩千首想宥重來賁一丘

次韻酬徐仲元

投老逍遙屺與堂天刑真已脫
桁楊緣源靜翳無魚淦
度谷深追有鳥顏自喜田園安
五柳但嫌尸祝擾庚桑

相看不厭唯夫子風味真如顧建康

送程公闢得謝歸姑蘇

東歸行路歎賢哉碧落新除寵上才
白傅林塘傳畫去吳王花鳥入詩來
唱酬自有微之在談笑應容逸少陪

少保元絳謝事居姑蘇又王除此兩翁相見外不知三
中甫善歌詞與相唱酬燕集

逕為誰開

登寶公塔

倦童疲馬放松門自把長筇倚石根
江月轉空為白晝

嶺雲分暝與黃昏
鼠搖岑寂聲隨起
鷓矯荒寒影對翻
當此不知誰客主
道人忘我我忘言

重登寶公塔復用前韻

空見方墳涌半霄
難將生死問參寥
應身東返知何國
瑞像西歸自本朝
遺寺有門非輦路
故池無鉢但僧瓢
獨龍下視皆陳迹
追數齊梁亦未遙

紙暖閣

聯屏蓋障一尋方
南設鈎簾北置牀
側座對敷紅絮暖

仰牕分啓碧紗涼
氈廬易以梅烝壞
錦幄終於草野妨
楚穀越藤真自稱
每糊因得減書囊

小姑

小姑未嫁與蘭支
何恨流傳樂府詩
初學水仙騎赤鯉
竟尋山鬼從文貍
繽紛雲襖空棠檝
綽約煙鬟獨桂旗
弄玉有祠終或往
飛瓊無夢故難知

呈陳和叔并序

嘉祐末和叔以集賢校理判登聞鼓院同知太常禮

院皮場街有園數畝中置二椽甃衮丈北戶臨溝略
約通街旁作小屋毀輜車為蓋某以直集賢院為三
司度支判官以知制誥糾察在京刑獄同管勾三班
院間度約飯車蓋下隨所有無坐卧甃上笑語常至
夜如此三歲而和叔遭太夫人憂未幾某亦喪親以
去時永昭陵尚未復土也後與和叔皆蒙今上拔
用數會議語皆憂傷之餘責厚事叢無復故情元豐
元年某食觀使祿居鍾山南和叔經略廣東道舊帳

然某作詩以叙其事

毀車為屋僅容身三歲相要薄主人晝寓椽輒常至夜
冬泂溝約復尋春南陔不洎公歸里蒼墓垂成我喪親
後會縱多無此樂山林投老一傷神

全椒張公有詩在北山西庵僧者墁之悵然有感
十年怱悵躡山阡終欲持杯滴到泉東路角巾非故約
西州華屋漫修椽幽明永隔休炊黍真俗相妨久絕弦
遺墨每看疑邂逅復隨人事散如煙

讀眉山集次韻雪詩二首

若木昏昏末有鷓凍雷深閉阿香車搏雲忽散筴為屑
翦水如分綴作花擁帚尚憐南北巷持杯能喜兩三家
戲接弄掬輸兒女羔袖龍鍾手獨叉

戲搖微縞女鬟鷓試咀流酥已頰車歷亂稍埋冰揉粟
消沈時點水圓花豈能舴艋真尋我且與蝸牛獨卧家
欲挑青腰還不敢直須詩膽付劉叉

次韻奉和蔡樞密南京種山藥法

蔡詩并序云蒙見索南都種山

藥法并以生頭數十莖送上輒成小詩青青正
是中分天區種何妨試玉延即見引須綠夏木
定知如踈薦冬筵潤還御水冰霜結蔭近堯雲
雨露偏自裹自題還自媿揠苗應笑宋人然

區種拋來六七年春風條蔓想宛延難追老圃莓苔徑
空對珍盤玳瑁筵嘉種忽傳河右壤靈苗更長闕西偏
故畦穿斲知何日南望鍾山一慨然

上巳聞苑中樂聲書事

苑中誰得從春游想見漸臺瓦欲流御水曲隨花影轉
宮雲低繞樂聲留年華未破清明節日暮初回袂楔舟

更覺至尊思慮遠不應全為拙倡優

用樂道舍人韻書十日事呈樂道舍人聖從待制
東門人物亂如麻想見新鞵照路華午鼓已傳三刻漏
從官初賜一杯茶忽忽殿下催分首擾擾官前聽賣花
歸去莫言天上事但知呼客飲流霞

詳定試卷

童子常誇作賦工暮年羞悔有揚雄當時賜帛倡優等
今日論才將相中細甚客卿因筆墨卑於爾雅注魚蟲

漢家故事真當改新詠知君勝弱翁

奉酬楊樂道

邂逅聯裾殿閣春却愁容易即離羣相知不必因相識
所得如今過所聞近代聲名出盧駱前朝筆墨數淵雲
與公家世由來事愧我初無百分

送李質夫之陝府

平世求才漫至公悠悠羈旅士多窮十年見子尚短褐
千里隨人今北風戶外屨貧虛自滿樽中酒賤亦常空

共嫌欲老無機械心事還能與我同

次韻吳季野題岳上人澄心亭

高亭五月尚寒生回首塵沙自鬱蒸
砌水亂流穿石底檻雲高出蔽山層
躋攀欲絕人間世締構知從物外僧
腸胃坐來清似洗神奇未怪佛圖澄

送彥珍

挾筴窮鄉滿鬢絲陂田荒盡豈嘗窺
未應谷口終身隱正合菑川舉國推
握手百憂空往事還家一笑即芳時

柘岡定有辛夷發亦見東風使我知

寄張先郎中

留連山水住多時年比馮唐未覺衰篝火尚能書細字
郵筒還肯寄新詩胡牀月下知誰對蠻榼花前想自隨
投老王恩聊欲報每瞻高躅恨歸遲

寄黃吉甫

朱顏去似朔風驚白髮多於野草生挾策讀書空有得
求田問舍轉無成解鞍烏石岡邊坐攜手辛夷樹下行

今日追思真樂事黃塵深處走雞鳴

即席次韻微之泛舟

畫舸幽尋北果園應將陳迹問桑門地隨牆墅行多曲
天著岡巒望易昏故國時平空有木荒城人少半為村
悠悠興廢皆如此賴付乾愁酒一樽

示長安君

少年離別意非輕老去相逢亦愴情草草杯盤供笑語
昏昏燈火話平生自憐湖海三年隔又作塵沙萬里行

欲問後期何日是寄書應見雁南征

次韻微之即席

釀成吳米野油囊却愛清談氣味長閒日有僧來北阜
平時無盜出南塘風亭對竹酬孤峭雪逕尋梅認暗香
江水中灑應未變一杯終欲就君嘗

思王逢原三首

布衣阡陌動成羣卓犖高才獨見君杞梓豫章蟠絕壑
騏驎馭裏跨浮雲行藏已許終身共生死那知半路分

便恐世間無妙質，鼻端從此罷揮斤。

蓬蒿今日想紛披，冢上秋風又一吹。
妙質不為平世得，微言唯有故人知。
廬山南墮當書案，滄水東來入酒卮。
陳迹可憐隨手盡，欲歡無復似當時。

百年相望濟時功，歲路何知向北窮。
鷹隼奮飛凰羽短，騏驎埋沒馬羣空。
郎舊業無兒付，康子高才有婦同。
想見江南原上墓，樹枝零落紙錢風。

季春上旬苑中即事

輦路行看斗柄東，簾垂殿閣轉春風。
樹林隱翳燈含霧，河漢欹斜月墜空。
新蕊漫知紅萼萼，舊山常夢直叢叢。
賞心樂事須年少，老去應無日再中。

與微之同賦梅花得香字三首

漢宮嬌額半塗黃，粉色凌寒透薄妝。
好借月魂來映燭，恐隨春夢去飛揚。
風亭把盞酬孤豔，雪徑回輿認暗香。
不為調羹應結子，直須留此占年芳。

結子非貪鼎鼎嘗，偶先紅杏占年芳。
從教臘雪埋藏得

金史口人卷十九
卷十九
却怕春風漏洩香不御鉛華知國色祇裁雲縷想仙裝
少陵為爾牽詩興可是無心賦海棠

淺淺池塘短短牆年年為爾惜流方向人自有無言意
傾國天教抵死香鬢裊黃金危欲墮蒂團紅蠟巧能裝
嬋娟一種如冰雪依倚春風笑野棠

度麾嶺寄莘老

區區隨傳換冬春夜半懸崖託此身豈慕王尊能許國
直緣毛義欲私親施為已壞生平學夢想猶歸寂寞濱

風月一歌勞者事能明吾意可無人

送遜師歸舒州

山川相對一悲翁往事紛紛夢寐中
邂逅故人恩意在低徊今日笑言同
看吹陌上楊花滿忽憶巖前蕙帳空
亦見桐鄉諸父老為傳衰颯病春風

次韻酬宋玘二首

洗雨吹風一月春山紅漫漫綠紛紛
褰裳遠野誰從我散策空陂忽見君
青眼坐傾新歲酒白頭追誦少年文

因嗟涉世終無補久使高才雍上聞

山陂疇昔從吾親諸父先生各佩紛零落長年誰語此
遲回故地却逢君衣冠偶坐論經術襁褓當時刺繡文
更怪高材終未遇有司何日選方聞

夢張劔州

萬里憐君蜀道歸相逢似喜語還悲江淮別業依何處
日月新阡卜幾時自說曲阿猶未穩即尋湓水去猶疑
茫然却是陳橋夢昨日春風馬上思

次韻張唐公馬上

揭節初悲力不任，賜身終愧謬恩臨。
病來氣弱歸宜早，偷取官多責恐深。
膏澤未施空謗怨，瘡痍猶在豈謳吟。
黃昏信馬江城路，欲訪何人話此心。

上元戲呈貢父

車馬紛紛白晝同，萬家燈火暖春風。
別開閭闔壺天外，特起蓬萊陸海中。
盡取繁華供俠少，祇分牢落與衰翁。
不知太乙遊何處，定把青藜獨照公。

和楊樂道見寄

宅帶園林五畝餘，蕭條還似茂陵居。
殺青滿架書新繕，生白當牕室久虛。
孤學自難窺奧密，重言猶得慰空疎。
相思每欲投詩社，只待春蒲葉又書。

次御河寄城北會上諸友

客路花時祇攬心，行逢御水半晴陰。
背城野色雲邊盡，隔屋春聲樹外深。
香草已堪回步履，午風聊復散衣襟。
憶君載酒相追處，紅萼青跗定滿林。

寄友人三首

萬里書歸說我愁，知君不忘北城幽。
一篇封禪才難學，三畝蓬蒿勢易求。
欲與山僧論地券，願為鄰舍事田疇。
應須急作南征計，漠北風沙不可留。

水邊幽樹憶同攀，曾約移居向北間。
欲語林塘迷舊逕，却隨車馬入他山。
飛花著地容難冶，鳴鳥窺人意轉閒。
物色可歌春不返，相思空復慘朱顏。

一別三年至一方，此身漂蕩只殊鄉。
看沙更覺蓬萊淺。

數日空驚霹靂忙
渺渺水波低
赤岸濛濛雲氣淡
扶桑登臨舊興無
多在但有浮槎意
未忘

寄張諤招張安國金陵法曹

我老願為臧丈人
君今少壯豈長貧
好須自致青冥上
可且相從寂寞濱
深谷黃鸝驕引子
曲碕翠碧巧藏身
尋幽觸靜還成興
何必區區九陌塵

欲往淨因寄涇州韓持國

紫荆山下物華新
只與都城共十春
令節想君攜綠酒

故情憐我踏黃塵，
汨魚已悔他年事。
搏虎方收末路身，
欲寄微言書不盡。
試尋僧閣望西人。

送別韓虞部

客舍街南初著巾，
與君兄弟即相親。
當年豈意兩家子，
今日更為同社人。
京洛風塵嗟阻澗，
江湖杯酒惜逡巡。
歸帆嶺北茫茫水，
把手何時寂寞濱。

懷舒州山水呈昌叔

山下飛鳴黃栗留，
溪邊飲啄白符鳩。
不知此地從君處，

亦有他人繼我不塵土生涯休盪滌風波時事只飄浮
相看髮禿無歸計一夢東南即自羞

寄袁州曹伯玉使君

宜春城郭繞樓臺想見登臨把一盃濕濕嶺雲生竹筍
冥冥江雨熟楊梅政成定入邦人詠詩就還隨驛使來
錯莫風沙愁病眼不知何日為君開

再至京口寄漕使曹郎中

漂流曾落此江邊憶與詩翁賦浩然

浩然堂名

鄉國去身猶

萬里驛亭分首已三年北城紅出高枝靚南浦青回老
樹圓還似昔時風露好只疑談笑在君前

次韻平甫金山會宿寄親友

天末海門橫北固煙中沙岸似西興已無船舫猶聞笛
遠有樓臺祇見燈山月入松金破碎江風吹水雪崩騰
飄然欲作乘桴計一到扶桑恨未能

次韻再遊城西李園

京師花木類多奇常恨春歸人未歸車馬喧喧走塵土

園林處處鍊芳菲，殘紅已落香猶在。
羈客多傷涕自揮，我亦悠悠無事者。
約君聯騎訪郊圻。

予求守江陰未得，酬昌叔憶江陰見及之作。

黃田港北水如天，萬里風檣看賈船。
海外珠犀常入市，人間魚蟹不論錢。
高亭笑語如昨日，末路塵沙非少年。
強乞一官終未得，祇君同病肯相憐。

奉寄子思以代別

南北蹉跎成兩翁，悲歡邂逅笑言同。
全家欲出嶺雲外。

匹馬肯尋山雨中趨府折腰嗟踽踽聽泉分手惜怱怱
寄聲但有加飡飯才業如君豈久窮

留題微之廨中清輝閣

故人名字在瀛州邂逅低回向北留鷗鳥一隻隨坐笑
荷花十丈對冥搜水涵樽俎清如洗山染衣巾翠欲流
宣室應疑鬼神事知君能復幾來遊

元珍以詩送綠石硯所謂玉堂新樣者

玉堂新樣世爭傳況以蠻溪綠石鐫嗟我長來無異物

愧君持贈有佳篇久埋瘴霧看猶濕一取春波洗更鮮
還與故人袍色似論心於此亦同堅

金陵懷古四首

霸祖孤身取二江子孫多以百城降豪華盡出成功後
逸樂安知與禍雙東府舊基留佛刹後庭餘唱落船窓
黍離麥秀從來事且置興亡近酒缸

天兵南下此橋江敵國當時指顧降山水雄豪空復在
君王神武自難雙留連落日頻回首想像餘墟獨倚窓

却怪夏陽纔一葦漢家何事費罌缸
地勢東回萬里江雲間天闕古來雙兵纏四海英雄得
聖出中原次第降山水寂寥埋王氣風煙蕭颯滿僧窓
廢陵壞冢空冠劔誰復沾纓酌一缸

憶昨天兵下蜀江將軍談笑士爭降黃旗已盡年三百
紫氣空收劔一雙破堞自生新草木廢宮誰識舊軒窓
不須搔首尋遺事且倒花前白玉缸

次韻舍弟遇子固憶少述

時舍弟
在臨川

歸計何時就一廛寒城回首意茫然野林細錯黃金日
溪岸寬圍碧玉天飛兔已聞追騷裏太阿猶恨失龍泉
遙知更憶河濱友從事能忘我獨賢

次韻答平甫

高蟬抱殼悲聲切新鳥爭巢諍語忙長樹老陰欺夏日
晚花幽豔敵春陽雲歸山去當簷靜風過溪來滿坐涼
物物此時皆可賦悔予千里不相將

金明池

宜秋西望碧參差憶看鄉人禊飲時斜倚水開花有思
緩隨風轉柳如癡青天白日春常好綠髮朱顏老自悲
跋馬未堪塵滿眼夕陽偷理釣魚絲

葛溪驛

缺月昏昏漏未央一燈明滅照秋床病身最覺風露早
歸夢不知山水長坐感歲時歌慷慨起看天地色淒涼
鳴蟬更亂行人耳正抱疎桐葉半黃

泛舟青溪入水門登高齋奉呈康叔

簿領紛紛惜此時起攜佳客散沈迷十圍但見諸營柳
九曲難尋故國溪牽埭欲隨流水遠放船終礙畫橋低
子猷清興何曾盡想憶高齋更一躋

九日登東山寄昌叔

城上啼烏破寂寥思君何處坐苔莧應須綠酒醺黃菊
何必紅裙弄紫簫落木雲連秋水渡亂山煙入夕陽橋
淵明久負東籬醉猶分低心事折腰

寄吳成之

綠髮溪山笑語中
豈知翻手兩成翁
辛夷屋角搏香雪
躑躅岡頭挽醉紅
想見舊山茅徑在
追隨今日板輿空
渭陽車馬嗟何及
榮祿方當與子同

寄曾子固

斗粟猶慙報禮輕
敢嗟吾道獨難行
脫身負米將求志
戮力乘田豈為名
高論幾為衰俗廢
壯懷難值故人傾
荒城回首山川隔
更覺秋風白髮生

寄王回深甫

少年倏忽不再得後日歡娛能幾何顧我面顏衰更早
憐君身世病還多牕間暗淡月含霧船底飄飄風送波
一寸古心俱未試相思中夜起悲歌

寄闕下諸父兄兼示平甫兄弟

父兄為學衆人知小弟文章亦自奇家勢到今宜有後
士才如此豈無時久聞陽羨溪山好頗與淵明性分宜
但願一門皆貴仕時將車馬過茅茨

鍾山西庵白蓮亭

山亭新破一方苔
白帝留花滿四隈
野豔輕明非傅粉
秋光清淺不憑材
鄉窮自作幽人伴
歲晚誰為靜女媒
可笑遠公池上客
却因松菊賦歸來

次韻舍弟賞心亭即事

檻折簷傾野水傍
臺城佳氣已消亡
難披梗莽尋千古
獨倚青冥望八荒
坐覺塵沙昏遠眼
忽看風雨破驕陽
扁舟此日東南興
欲盡江流萬里長

送張仲容赴杭州孫公辟

萬屋相誇漆與丹，笑歌長在綺紈間。
綵船春戲城邊水，畫燭秋尋寺外山。
憶我屢隨遊客入，喜君今赴辟書還。
遙知曼倩威行久，赤筆應從到日閒。

次韻春日即事

人間尚有薄寒侵，和氣先薰草樹心。
丹白自分齊破蕾，青黃相向欲交陰。
潺潺嫩水生幽谷，漠漠輕煙動遠林。
病得一官隨太守，班春無助愧周任。

江上

村落家家有濁醪青旗招客解祗裯春風似補林塘破
野水遙連草樹高寄食舟車隨處弊行歌天地此身勞
遲回自負平生意豈是明時惜一毛

午枕

百年春夢去悠悠不復吹簫向此留野草自花還自落
鳴禽相乳亦相酬舊蹊埋沒開新徑朱戶欹斜見畫樓
欲把一盃無伴侶眼看興廢使人愁

寄石鼓寺陳伯庸

鯨海無風白日閒
天門當面險難攀
塵埃掉臂離長陌
琴酒和雲入舊山
仁義未饒軒冕貴
功名莫信鬼神慳
郭東一點英雄氣
時伴君心夜斗間

姑胥郭

誤褫雲巾別故山
抵吳由越兩間關
千家漁火秋風市
一葉歸舟暮雨灣
旅病恹恹如困酒
鄉愁脈脈似連環
情知帶眼從前緩
更恐顛毛自此斑

太湖恬亭

檻臨溪上綠陰圍溪岸高低入翠微日落斷橋人獨立
水涵幽樹鳥相依清遊始覺心無累靜處誰知世有機
更待夜深同徙倚秋風斜月釣船歸

次韻酬吳彥珍見寄

時彥珍為教授
學有右軍墨池

君作新詩故起予一吟聊復報雙魚杖藜高徑誰來往
散帙空堂自卷舒樹外鳥啼催晚種花間人語趁朝虛
春風處處堪攜手何事臨池苦學書

自金陵如丹陽道中有感

數百年來王氣消難將前事問漁樵
苑方秦地皆蕪沒
山借揚州更寂寥
荒埭暗雞催月曉
空場老雉挾春驕
豪華祇有諸陵在
往往黃金出市朝

讀詔書

慶曆七年

去秋東出汴河梁
已見中州旱勢強
日射地穿千里赤
風吹沙度滿城黃
近聞急詔收羣策
頗說新年又亢陽
賤術縱工難自獻
心憂天下獨君王

除夜寄舍弟

一尊聊有天涯憶百感翻然醉裏眠酒醒燈前猶是客
夢回江北已經年佳時流落真何得勝事蹉跎只可憐
唯有到家寒食在春風同泛瀨溪船

送王補之行風忽作因題四句於舟中

淮口西風急君行定幾時故應今夜月未便照相思

離蔣山

出谷頻回首逢人更斷腸桐鄉豈愛我我自愛桐鄉

江上

江水漾西風江花脫晚紅離情被橫笛吹過亂山東
秣陵道中口占二首

經世才難就田園路欲迷慙將白髮下馬照青溪
歲熟田家樂秋風客自悲茫茫曲城路歸馬日斜時
雜詠二首

證聖南朝寺三年到百回不知牆下路今日幾荷開
桃李石城塢餉田三月時柴荆常自閉花發少人知

梅花

牆角數枝梅凌寒獨自開遙知不是雪為有暗香來

歌元豐

豚柵雞埭晻靄間暮林搖落獻南山豐年處處人家好
隨意飄然得往還

九日

九日無歡可得追飄然隨意歷山陂蔣陵西曲

一作風面

塵慘

一作澹

也有黃花一兩枝

初晴

幅巾慵整露蒼華
度隴深尋一徑斜
小雨初晴好天氣
晚花殘照野人家

脩然

脩然三月閉柴荆
綠葉陰陰忽滿城
自是老年遊興少
春風何處不堪行

竹裏

竹裏編茅倚石根
竹莖疎處見前村
閒眠盡日無人到
自有春風為掃門

隨意

隨意柴荆手自開沿岡度塹復登臺
小橋風露扁舟月
迷鳥羈雌竟往來

初夏即事

石梁茅屋有彎碕流水濺濺度兩陂
晴日暖風生麥氣
綠陰幽草勝花時

光宅寺

梁武帝宅也其北齊安陽淮
齊武帝宅也宋興又在其北

齊安孤起宋興前光宅相仍一水邊
蜂分蟻爭今不見

故窠遺堦尚依然

與寶覺宿龍華院絕句

舊有詩云京口瓜洲一水間鍾山只隔數重山春風

自綠江南岸明

月何時照我還

世間投老斷攀緣
忽憶東遊已十年
但有當時京口月
與公隨我故依然

自定林過西庵

午雞聲不到禪林
栢子煙中靜擁衾
忽憶西巖道人語
杖藜乘興得幽尋

謝安墩

我名公字偶相同我屋公墩在眼中
公去我來墩屬我不應墩姓尚隨公

山陂

山陂院落今按種城郭樓臺已放燈
白髮逢春唯有睡睡聞啼鳥亦生憎

北山有懷

香火因緣寄北山主恩投老更人間
傷心躑躅岡頭路

明月春風自往還

北陂杏花

一陂春水遶花身
花影妖嬈各占春
縱被春風吹作雪
絕勝南陌碾成塵

江梅

江南歲盡多風雪
也有江梅漏洩春
顏色凌寒終慘澹
不應搖落始愁人

北山

北山輸綠漲橫陂直塹回塘灩灩時細數落花因坐久
緩尋芳草得歸遲

楊柳

楊柳杏花何處好石梁茅屋雨初乾綠垂靜路要深駐
紅寫清波得細看

出郊

川原一片綠交加深樹冥冥不見花風日有情無處著
初迴光景到桑麻

呈陳和叔

數椽生草覆莓苔

一作數椽牢
落長莓苔

一徑牆陰斲雪開
玉匣

囊衣新徙舍杖藜從此為君來

數椽庖屋茨生草三畝荒園種晚蔬
永日終無一杯酒
可能留得故人車

與耿天騭會話

邯鄲四十餘年夢相對黃梁欲熟時
萬事祇如空鳥迹
怪君強記尚能追

庚申正月遊齊安

水南水北重重柳山後山前處處梅未即此身隨物化
年年長趁此時來

庚申正月遊齊安有詩云水南水北重重柳壬戌
正月再遊

招提詩壁漫黃埃忽忽籠紗兩過梅老值白雞能不死
復隨春色破寒來

壬戌正月晦與仲元自淮上復至齊安

風暖柴荆處處開
雪乾沙淨水洄洄
意行却得前年路
看盡梅花看竹來

悟真院

野水從橫漱屋除
午牕殘夢鳥相呼
春風日日吹香草
山北山南路欲無

鍾山晚步

小雨輕風落棟花
細紅如雪點平沙
槿籬竹屋江村路
時見宜城賣酒家

勘會賀蘭溪主

賀蘭溪洛京地名陳繹買地築居於郵中間之

賀蘭溪上幾株松南北東西有幾峰買得住來今幾日
尋常誰與坐從容

書湖陰先生壁

茆簷長掃靜無苔花木成畦手自栽一水護田將綠繞
兩山排闥送青來

書何氏宅壁

有興提魚就公煮此言雖在已三年皖瀟終負幽人約

空對湖山坐惘然

示公佐

殘生傷性老耽書年少東來復起予
各據槁梧同不寐
偶然聞雨落階除

送黃吉父將赴南康官歸金谿二首

柘岡西路白雲深想子東歸得重尋
亦見舊時紅躑躅
為言春至每傷心

還家一笑即芳辰好與名山作主人
邂逅五湖乘興往

相邀錦繡谷中春

金陵即事三首

水際柴門一半開
小橋分路入青苔
背人照影無窮柳
隔屋吹香併是梅

結綺臨春歌舞地
荒蹊狹巷兩三家
東風漫漫吹桃李
非復當時仗外花

昏黑投林曉更驚
背人相喚百般鳴
柴門長閉春風暖
事外還能見鳥情

烏塘

烏塘渺渺綠平隄隄上行人各有攜
試問春風何處好
辛夷如雪柘岡西

柘岡

萬事紛紛祇偶然老來容易得新年
柘岡西路花如雪
迴首春風最可憐

金陵

金陵陳迹老莓苔南北遊人自往來
最憶春風石城塢

家家桃杏過牆開

午枕

午枕花前簟欲流
日催紅影上簾鉤
窺人鳥喚悠颺夢
隔水山供宛轉愁

州橋

州橋蹋月想山椒
回首哀湍未覺遙
今夜重聞舊嗚咽
却看山月話州橋

觀明州圖

明州城郭畫中傳尚記西亭一樣船投老心情非復昔
當時山水故依然

和張仲通憶鍾陵二首

一夢章江已十年故人重見想皤然祇應兩岸當時柳
能到春來尚可憐

逸少池邊有一丘西山南浦慣曾遊殘年歸去終無樂
聞說章江即淚流

鍾山即事

澗水無聲繞竹流
竹西花草弄春柔
茅簷相對坐終日
一鳥不鳴山更幽

隴東西二首

隴東流水向東流
不肯相隨過隴頭
祇有月明西海上
伴人征戍替人愁

隴西流水向西流
自古相傳到此愁
添却征人無限淚
怪來嗚咽已千秋

重將

重將白髮旁牆陰陳迹茫然不可尋
花鳥總知春爛漫
人間獨自有傷心

楚天

楚天如夢水悠悠
花底殘紅漫不收
獨遶去年揮淚處
還將牢落對滄洲

送和甫至龍安微雨因寄吳氏女子

荒煙涼雨助人悲
淚染衣巾不自知
除却春風沙際綠
一如看汝過江時

與北山道人

時果疏泉帶淺山柴門雖設要常關
別開小徑連松路祇與鄰僧約往還

江寧夾口

落帆江口月黃昏小店無燈欲閉門
側出岸沙楓半死繫船應有去年痕

夜直

金爐香燼漏聲殘翦翦輕風陣陣寒
春色惱人眠不得

月移花影上欄干

金陵報恩大師西堂方丈

蕭蕭出屋千竿玉靄靄當牕一炷雲心力長年人事外
種花移石尚慇懃

獨卧

茆簷午影轉悠悠門閉青苔水亂流百轉黃鸝看不見
海棠無數出牆頭

孟子

沈魄浮魂不可招
遺編一讀想風標
何妨舉世嫌迂濶
故有斯人慰寂寥

臘享

明星慘澹月參差
萬竅含風各自悲
人散廟門燈火盡
却尋殘夢獨多時

杏花

垂楊一徑紫苔封
人語蕭蕭院落中
獨有杏花如喚客
倚牆斜日數枝紅

泊姚江

山如碧浪翻江去水似青天照眼明
喚取仙人來住此
莫教辛苦上層城

遊鍾山

兩山松櫟暗朱藤一水中間勝武陵
千梵隔雲知有寺
夕陽歸去不逢僧

杭州望湖樓回馬上作呈玉汝樂道

水光山氣碧浮浮落日將歸又少留
從此祇應長入夢

夢中還與故人遊

春日席上

十年流落負歸期
臨水登山各有思
今日樽前千萬恨
不堪頻唱鷓鴣辭

戲贈育王虛白長老

白雲山頂病禪師
昔日公卿各贈詩
行盡四方年八十
却歸荒寺有誰知

無錫寄正之

健席高檣送病身
亂山荒隴障歸津
應須一曲千回首
西去論心更幾人

初晴

一抹明霞黯淡紅
瓦溝已見雪花融
前山未放曉寒散
猶鎖白雲三兩峰

越人以幕養花因遊其下

尚有殘紅已可悲
更憂回首祇空枝
莫嗟身世渾無事
睡過春風作惡時

鄞縣西亭

收功無路去無田
竊食窮城度兩年
更作世間兒女態
亂栽花竹養風煙

宋詩鈔卷十九



總校官庶吉士臣張能照
校對官庶吉士臣陳文樞
謄錄監生臣周學澐

欽定四庫全書薈要

集部

宋詩鈔卷二十



詳校官候選知縣臣吳甸華

欽定四庫全書薈要卷二萬二百七十三

集部

宋詩鈔卷二十

內閣中書舍人吳之振編

蘇軾東坡詩鈔上

軾字子瞻一字和仲眉州山人嘉祐二年進士

調福昌主簿對制策入三等除大理評事簽書鳳翔
府判官入判登聞鼓院召試直史館丁父憂熙寧二
年還朝判官告院權開封府推官出判杭州知密徐

湖三州以為詩謗訕逮赴臺獄謫黃州團練副使安置築室於東坡自號東坡居士移常州哲宗立復朝奉郎知登州召為禮部郎中遷起居舍人尋除翰林學士兼侍讀拜龍圖閣學士出知杭州召為翰林承旨數月知潁州揚州復召為兵部尚書兼侍讀改禮部兼端明殿翰林侍讀兩學士出知定州紹聖初貶寧遠軍節度副使惠州安置又貶瓊州別駕居儋耳徽宗立移舒州團練副使徙永州更三赦還提舉玉

局觀復朝奉郎建中靖國元年卒于常州年六十六

南渡後贈太師諡文忠子瞻詩氣象洪濶鋪叙宛轉
子美之後一人而已然用事太多不免失之豐縟雖
其學問所溢要亦洗削之功未盡也而世之訾宋詩
者獨於子瞻不敢輕議以其胸中有萬卷書耳不知
子瞻所重不在此也加之梅溪之註鬪釘其間則子
瞻之精神反為所掩故讀蘇詩者汰梅溪之註并汰
其過於豐縟者然後有真蘇詩也

辛丑十一月十九日既與子由別於鄭州西門之

外馬上賦詩一篇寄之

不飲胡為醉兀兀此心已逐歸鞍發歸人猶自念庭闈
今我何以慰寂寞登高回首坡隴隔惟見烏帽出復沒
苦寒念爾衣裘薄獨騎瘦馬踏殘月路人行歌居人樂
僮僕怪我苦悽惻亦知人生要有別但恐歲月去飄忽
寒燈相對記疇昔夜雨何時聽蕭瑟君知此意不可忘

慎勿苦愛高官職

嘗有夜雨對床
之言故云爾

病中大雪數日未嘗起觀號令趙薦以詩相屬戲
用其韻答之

經旬卧齋閣終日親劑和不知雪已深但覺寒無奈飄
蕭窻紙鳴堆壓簷板墮

關中皆以板為簷

風飈助凝冽幃幔困

掀簸惟思近醇醲未敢窺璨瑳何時反炎赫却欲躬白
磨誰云座無羶尚有表充貨西鄰歌吹發促席寒威挫
崩騰踏成逕繚繞飛入坐人歡无先融飲雋併屢卧嗟
余獨愁寂空室自困坷欲為後日賞恐被遊塵浣寒更

報新霽皎月懸半破有客獨苦吟清夜默自課詩人例
窮蹇秀句出寒餓何當暴雪霜庶以躡郊賀

歲晚相與餽問為餽歲酒食相邀呼為別歲至除
夜達旦不眠為守歲蜀之風俗如是余官岐下
歲暮思歸而不可得故為此三詩寄子由

餽歲

農功各已收歲事得相佐為歡恐無具假物不論貨山
川隨出產貧富稱小大真盤巨鯉橫發籠雙兔卧富人

事華靡綵繡光翻座貧者愧不能微執出春磨官居故人少里巷佳節過亦欲舉鄉風獨倡無人和

別歲

故人適千里臨別尚遲遲人行猶可復歲行那可追問歲安所之遠在天一涯已逐東流水赴海歸無時東鄰酒初熟西舍彘亦肥且為一日歡慰此窮年悲勿嗟舊歲別行與新歲辭去去勿回顧還君老與衰

守歲

欲知垂盡歲有似赴壑蛇脩鱗半已沒去意誰能遮況
欲繫其尾雖勤知奈何兒童強不睡相守夜謹譁晨雞
且勿唱更鼓畏添榻坐久燈燼落起看北斗斜明年豈
無年心事恐蹉跎努力盡今夕少年猶可誇

和子由踏青

春風陌上驚微塵遊人初樂歲華新人閒正好路旁飲
麥短未怕遊車輪城中居人厭城郭喧闐曉出空四鄰
歌鼓驚山草木動簞瓢散野鳥鳶馬何人聚衆稱道人

遮道賣符色怒瞋宜蠶使汝蠶如甕宜畜使汝羊如麕
路人未必信此語強為買服襪新春道人得錢徑沽酒
醉倒自謂吾符神

和子由蠶市

蜀人衣服常苦艱蜀人遊樂不知還千人耕種萬人食
一年辛苦一春閒閒時尚以蠶為市共忘辛苦逐欣歡
去年霜降斫秋荻今年箔積如連山破瓢為輪土為釜
爭買不翅金與紈憶昔與子皆童邕年年廢書走市觀

市人爭誇鬪巧智野人喑啞遭欺謾詩來使我感舊事
不悲去國悲流年

和子由論書

吾雖不善書曉書莫如我苟能通其意常謂不學可貌
妍容有顰蹙美何妨脣端莊雜流麗剛健含婀娜好之
每自譏不謂子亦頗書成輒棄去繆被旁人裹體勢本
濶畧結束入細麼子詩亦見推語重未敢荷邇來又學
射力薄愁官竒

官箭十二把吾能十一把箭耳

多好竟無成不精安用

夥何當盡屏去萬事付懶惰吾聞古書法守駿莫如跛
世俗筆苦驕衆中強鬼駭鍾張忽已遠此語與時左

和子由寒食

寒食今年二月晦樹林深翠已生煙遶城駿馬誰能借
到處名園意盡便但挂酒壺那計盞偶題詩句不須編
忽聞啼鴉驚羈旅江上何人治廢田

石鼓

冬十二月歲辛丑我初從政見魯叟舊聞石鼓今見之

文字鬱律蛟蛇走細觀初以指畫肚欲讀嗟如箱在口

韓公好古生已遲我今況又百年後強尋偏旁推點畫

時得一二遺八九我車既攻馬亦同其魚維鱖貫之柳

其詞云我車既攻我馬既同又云其魚維何維鱖維
鯉何以貫之維楊與柳惟此六句可讀餘多不可通古

器縱橫猶識鼎衆星錯落僅名斗糝糊半已似癩胝詰

曲猶能辨跟肘娟娟缺月隱雲霧濯濯嘉禾秀莨莠漂

流百戰偶然存獨立千載誰與友上追軒頡相唯諾下

揖冰斯同轂毅憶昔周宣歌鴻雁當時籀史變蝌蚪厭

亂人方思聖賢中興天為生者考東征徐虜闕虓虎北
伏犬戎隨指噬象胥雜沓貢狼鹿方召聯翩賜圭卣遂
因鼓鞶思將帥豈為考擊煩矇眊何人作頌比崧高萬
古斯文齊岫嶺勲勞至大不矜伐文武未遠猶忠厚欲
尋年歲無甲乙豈有名字記誰某自從周衰更七國竟
使秦人有九有掃除詩書誦法律投棄俎豆陳鞭杻當
年何人佐祖龍上蔡公子牽黃狗登山刻石頌功烈後
者無繼前無偶皆云皇帝巡四國烹滅強暴救黔首六

經既已委灰塵此鼓亦當遭擊掇傳聞九鼎淪泗上欲
使萬夫沈水取暴君縱欲窮人力神物義不汙秦垢是
時石鼓何處避無乃天公令鬼守興亡百變物自閒富
貴一朝名不朽細思物理多歎息人生安得如汝壽

王維吳道子畫

何處訪吳畫普門與開元開元有東塔摩詰留手痕吾
觀畫品中莫如二子尊道子實雄放浩如海波翻當其
下手風雨快筆所未到氣已吞亭亭雙林間彩暈扶桑

噉中有至人談寂滅悟者悲涕迷者手自捫蠻君鬼伯
千萬萬相排競進頭如龜摩詰本詩老佩芷襲芳蓀今
觀此壁畫亦若其詩清且敦祇園弟子畫鶴骨心如死
灰不復溫門前兩叢竹雪節貫霜根交柯亂葉動無數
一一皆可尋其源吳生雖妙絕猶以畫工論摩詰得之
於象外有如仙翮謝籠樊吾觀二子皆神俊又於維也
斂衽無間言

東湖

吾家蜀江上江水綠如藍爾來走塵土意思殊不堪況
當岐山下風物尤可慙有山禿如赭有水濁如泔不謂
郡城東數步見湖潭入門便清奧恍如夢西南泉源從
高來隨波走涵涵東去觸重阜盡為湖所貪但見蒼石
螭開口吐清甘借汝腹中過胡為目眈眈新荷弄晚涼
輕棹極幽探飄風忘遠近偃息遺佩蓼深有龜與魚淺
有螺與蚌曝晴復戲雨戢戢多於蠶浮沈無停餌倏忽
遽滿籃絲緡雖強致瑣細安足戡聞昔周道興翠鳳棲

孤嵐飛鳴飲此水照影弄毳毳

此古飲風池也

至今多梧桐合

抱如彭聃綵羽無復見上有鷗搏鷗嗟予生雖晚考古

意所妣圖書已漫漶猶復訪僑郊卷阿詩可繼此意久

已含扶風古三輔政事豈汝諳聊為湖上飲一縱醉後

談門前遠行客劫劫無留驂問胡不回首無乃赴朝參

予今正踈懶官長幸見函不辭日遊再行恐歲滿三暮

歸還倒載鐘鼓已齟齬

音諸

李氏園

李茂貞園也今為王氏所有

朝遊北城東回首見脩竹下有朱門家破牆圍古屋舉

鞭叩其戶幽響答空谷入門所見夥十步九移目異花

兼四方野鳥喧百族其西引溪水活活轉牆曲東注入

深林林深窻戶綠水光兼竹淨時有獨立鵠林中百尺

松歲久蒼鱗感豈惟此地少意恐關中獨小橋過南浦

夾道多喬木隱如城百雉挺若舟千斛陰陰日光淡黯

黯秋氣蓄盡東為方池野雁雜家鶩紅梨驚合抱映島

孤雲馥春光水溶漾雪陣風翻撲其北臨長溪波聲捲

平陸北山卧可見蒼翠間
磽秃我時來周覽問此誰所
築云昔李將軍負嶮乘衰叔
抽錢算間口但未權羹粥
當時奪民田失業安敢哭
誰家美園圃籍沒不容贖此
亭破千家鬱鬱城之麓
將軍竟何事蟣蝨生刀韜
何嘗載美酒來此駐車轂
空使後世人聞名頸猶縮
俗猶呼皇后園
蓋茂貞謂其妻也
我今官正閒屢至因休沐
人生營居止竟為何人卜
何當辦一身永與清景逐

秦穆公墓

橐泉在城東墓在城中無百步乃知昔未有此城秦人以泉識公墓昔公生不誅孟明豈有死之日而忍用其良乃知三子徇公意亦如齊之二子從田橫古人感一飯尚能殺其身今人不復見此等乃以所見疑古人古人不可望今人益可傷

七月二十四日以久不雨出禱礮溪是日宿虢縣二十五日晚自虢縣渡渭宿於僧舍曾閣閣故曾氏所建也夜久不寐見壁有前縣令趙薦留

名有懷其人

龕燈明滅欲三更
欹枕無人夢自驚
深谷留風終夜響
亂山銜月半牀明
故人漸遠無消息
古寺空來有姓名
欲向磻溪問姜叟
僕夫屢報斗杓傾

和子由記園中草木四首

煌煌帝王都
赫赫走羣彥
嗟汝獨何為
閉門觀物變
微物豈足觀
汝獨觀不勸
牽牛與葵蓼
採摘入詩卷
吾聞東山傅
置酒攜嫵婉
富貴未能忘
聲色聊自遣
汝今又

不然時節看瓜蔓懷寶自足珍
藝蘭那計晚吾歸於汝
處慎勿嗟歲晚

荒園無數畝草木動成林
春陽一已敷妍醜各自矜
蒲萄雖滿架困倒不能任
可憐病石榴花如破紅襟
葵花雖粲粲蒂淺不勝簪
叢蓼晚可喜輕紅隨秋深
物生感時節此理等廢興
飄零不自由盛亦非汝能

萱草雖微花孤秀自能拔
亭亭亂葉中一一芳心插
牽牛獨何畏詰曲日牙蘂
走尋荆與榛如有宿昔約
南齋

讀書處清翠曉如潑偏工貯秋雨歲歲壞籬落

我歸自南山山翠猶在目心隨白雲去夢繞山之麓汝
從何方來笑齒粲如玉探懷出新詩秀語奪山綠覺來
已茫昧但記說秋菊有如採樵子入洞聽琴筑歸來寫
遺聲猶勝人間曲

八月十一日夜宿府學方和此詩夢
與弟遊南山出詩數十篇夢中甚愛

之及覺唯記一句
云蟋蟀悲秋菊

北寺

唐初傳有此亂後不留碑畏虎關門早無村得米遲山

泉自入甕野桂不勝炊信美那能久應先學忍飢

自仙遊回至黑水見居民姚氏山亭高絕可愛復

憩其上

山鷓曉辭谷似報遊人起出門猶屢顧慘若去吾里道
途險且迂繼此復能幾溪邊有危構歸駕聊復柅愛此
山中人縹渺如仙子平生慕獨住官爵同一屣胡為此
谿邊眷眷若有竢國恩久未報念此慙且泚臨風浩悲
吒萬世同一軌何年謝簪紱丹砂留迅晷

竹翹

野人獻竹翹腰腹大如盎
自言道旁得採不費置罔鴟
夷讓圓滑混沌慙瘦爽兩牙
雖有餘四足僅能髣逢人
自驚蹶悶若兒脫襁念茲微
陋質刀几安足枉就禽太
倉卒羞愧不能饗南山有孤
熊擇獸行舐掌

漢陂魚

陂在鄆縣

霜筠細破為雙掩中有長魚
如卧劔紫荇穿腮氣慘悽
紅鱗照坐光磨閃攜來雖遠
鬣尚動烹不待熟指先染

坐客相看為解顏香粳飽送如填塹早歲嘗為荆渚客
黃魚屢食沙頭店濱江易採不復珍盈尺輒棄無乃僭
自從西征復何有欲致南烹嗟久欠游儉瑣細空自腥
亂骨縱橫動遭砭故人遠餽何以報客俎久空驚忽贍
東道無辭信使頻西鄰幸有庖蒸醢

十二月十四日夜微雪明日早往南谿小酌至晚
南谿得雪真無價走馬來看及未消獨自披榛尋履迹
最先犯曉過朱橋誰憐破屋眠無處坐覺村飢語不囁

惟有暮鴉知客意驚飛千片落寒條

九月中曾題小詩於南溪竹上既而忘之昨日再
遊見而錄之

湖上蕭蕭疎雨過山頭靄靄暮雲橫陂塘水落荷將盡
城市人歸虎欲行

司竹監燒葦園因召都巡檢柴貽勗左藏以其徒
會獵園下

官園刈葦歲留槎深冬放火如紅霞枯槎燒盡有根在

春雨一洗皆萌芽黃狐老兔最狡捷賣侮百獸常矜誇
年年此厄竟不惜但愛蒙密爭來家風迴焰捲毛尾熱
欲出已被蒼鷹遮野人來言此最樂徒手曉出歸滿車
巡邊將軍在近邑呼來颯颯從矛戈戍兵久閒可小試
戰鼓雖凍猶堪搗雄心欲搏南澗虎陣勢頗學常山蛇
霜乾火烈聲爆野飛走無路號且呀迎人截來春逢箭
避犬逸去窮投置擊鮮走馬殊未厭但恐落日催棲鷄
弊旗仆鼓坐數獲鞍挂雉兔肩分麇主人置酒聚狂客

紛紛醉語晚更譁燎毛燔肉不暇割啗直欲追羲媧
青丘雲夢古所吒與此何啻百倍加苦遭諫疏說夷羿
又被賦客嘲淫奢豈如閒官走山邑放曠不與趨朝衙
農工已畢歲云暮車騎雖少賓殊佳酒酣上馬去不告
獵獵霜風吹帽斜

和子由木山引水

蜀江久不見滄浪江上枯槎遠可將去國尚能三犢載
汲泉何愛一夫忙崎嶇好事人應笑冷淡為歡意自長

卷二十
遙想納涼清夜永窓前微月照汪汪

和董傳留別

麤繒大布裏生涯腹有詩書氣自華
厭伴老儒烹瓠葉強隨舉子踏槐花
囊空不辦尋春馬眼亂行看擇壻車
得意猶堪誇世俗詔黃新濕字如鴉

次韻子由綠筠堂

愛竹能延客求詩剩挂牆
風梢千纛亂月影萬夫長
谷鳥驚甚響山蜂識酒香
只應陶靖節會聽北窓涼

送錢藻出守婺州得英字

老手便劇郡高懷厭承明聊紆東陽綬一濯滄浪纓東
陽佳山水未到意已清過家父老喜出郭壺漿迎子行
得所願愴恨居者情吾君方急賢日旰坐邇英黃金招
樂毅白璧賜虞卿子不少自貶陳義空崢嶸古稱為郡
樂漸恐煩敲榜臨分敢不盡醉語醒還驚

送劉道原歸覲南康

晏嬰不滿六尺長高節萬仞陵首陽青衫白髮不自歎

富貴在天那得忙十年閉戶樂幽獨
百金購書收散亡
竭來東觀弄丹墨聊借舊史誅姦強
孔融不肯下曹操
汲黯本自輕張湯雖無尺筆與寸刃
口吻排擊含風霜
自言靜中閱世俗有似不飲觀酒狂
衣巾狼藉又屢舞
傍人大笑供千場交朋翩翩去畧盡
惟我與子猶徬徨
世人共棄君獨厚豈敢自愛恐子傷
朝來告別驚何速
歸意已逐征鴻翔匡廬先生古君子
挂冠兩紀鬢未蒼
定將文度置膝上喜動鄰里烹猪羊
君歸為我道姓字

幅巾他日容登堂

傅堯俞濟源草堂

微官共有田園興老罷方尋隱退廬栽種成陰十年事
倉皇求買萬金無先生卜築臨清濟喬木如今似畫圖
鄰里亦知偏愛竹春來相與護龍雛

和柳子玉過陳絕糧次韻

如我自觀猶可厭非君誰復肯相尋圖書跌宕悲年老
燈火青熒語夜深早歲便懷齊物意微官敢有濟時心

南行千里成何事一聽秋濤萬鼓音

泗州僧伽塔

我昔南行舟繫汴逆風三日沙吹面舟人共勸禱靈塔
香火未收旗脚轉回頭頃刻失長橋却到龜山未朝飯
至人無心何厚薄我自懷私欣所便耕田欲雨刈欲晴
去得順風來者怨若使人人禱輒遂造物應須日千變
我今身世兩悠悠去無所逐來無戀得行固願留不惡
每到有求神亦倦退之舊云三百尺澄觀所營今已換

不嫌俗士汙丹梯
一看雲山遶淮甸

龜山

我生飄蕩去何求
再過龜山歲五周
身行萬里半天下
僧卧一庵初白頭
地隔中原勞北望
潮連滄海欲東遊
元嘉舊事無人記
故壘摧頽今在不

宋文帝遣將拒魏
太武築城此山

十月十六日記所見

風高月暗雲水黃
淮陰夜發朝山陽
山陽曉霧如細雨
炯炯初日寒無光
雲收霧卷已亭午
有風北來寒欲僵

忽驚飛電穿戶牖迅駛不復容遮防市人顛沛百賈亂
疾雷一聲如頽牆使君來呼晚置酒坐定已復日照廊
恍疑所見皆夢寐百種變怪旋消亡共言蛟龍厭舊穴
魚鼈隨徙空陂塘愚儒無知守章句論說黑白推何祥
惟有主人言可用天寒欲雪飲此觴

遊金山寺

我家江水初發源宦遊直送江入海聞道潮頭一丈高
天寒尚有沙痕在中泠南畔石盤陀古來出沒隨濤波

試登絕頂望鄉國江南江北青山多
羈愁畏晚尋歸楫
山僧苦留看落日微風萬頃靴文細
斷霞半空魚尾赤
是時江月初生魄二更月落天深黑
江心似有炬火明
飛焰照山棲鳥驚悵然歸卧心莫識
非鬼非人竟何物
江山如此不歸山江神見怪驚我頑
我謝江神豈得已
有田不歸如江水

是夜所見如此

自金山放船至焦山

金山樓觀何耽耽
撞鐘擊鼓聞淮南
焦山何有有脩竹

採薪汲水僧兩三雲霾浪打人迹絕時有沙戶祈春蠶
我來金山更留宿而此不到心懷慙同遊盡返決獨往
賦命窮薄輕江潭清晨無風浪自湧中流歌嘯倚半酣
老僧下山驚客至迎笑喜作巴人談自言久客忘鄉井
只有彌勒為同龕困眠得就紙帳暖飽食未厭山蔬甘
山林飢卧古亦有無田不退寧非貪展禽雖未三見黜
叔夜自知七不堪行當投劾謝簪組為我佳處留茆庵

吳人謂水中可田者為沙焦山長老中江人也

次韻子由柳湖感物

憶昔子美在東屯數間茆屋蒼山根
嘲吟草木調蠻獠欲與猿鳥爭啾喧
子今憔悴衆所棄驅馬獨出無往還
惟有柳湖萬株柳清陰與子供朝昏
胡為譏評不少借生意凌挫難為繁
柳雖無言不解愠世俗乍見應憮然
嬌姿共愛春濯濯豈問空腹脩蛇蟠
朝看濃翠傲炎赫夜愛疎影搖清圓
風翻雪陣春絮亂蠹響啄木秋聲堅
四時盛衰各有態搖落悽愴驚寒溫
南山孤松積雪底

抱凍不死誰復賢

戲子由

宛丘先生長如丘宛丘學舍小如舟常時低頭誦經史
忽然欠伸屋打頭斜風吹帷雨注面先生不愧傍人羞
任從飽死笑方朔肯為雨立求秦優眼前勃磈何足道
處置六鑿須天遊讀書萬卷不讀律致君堯舜知無術
勸農冠蓋鬧如雲送老鹽齏甘似蜜門前萬事不挂眼
頭雖長低氣不屈餘杭別駕無功勞畫堂五丈容旗旄

重樓跨空雨聲遠屋多人少風騷騷平生所慙今不恥
坐對疲氓更鞭箠道逢陽虎呼與言心知其非口諾唯
居高志下真何益氣節消縮今無幾文章小技安足程
先生別駕舊齊名如今衰老俱無用付與時人分重輕

吉祥寺賞牡丹

人老簪花不自羞花應羞上老人頭醉歸扶路人應笑
十里珠簾半上鉤

六月二十七日望湖樓醉書

黑雲翻墨未遮山
白雨跳珠亂入船
卷地風來忽吹散
望湖樓下水如天

放生魚鼈逐人來
無主荷花到處開
水枕能令山俯仰
風船解與月裴回

烏菱白芡不論錢
亂繫青菰裹綠盤
忽憶嘗新會靈觀
滯留江海得加餐

獻花游女木蘭橈
細雨斜風濕翠翹
無限芳洲生杜若
吳兒不識楚詞招

未成小隱聊中隱
可得長閒勝暫閒
我本無家更安往
故鄉無此好湖山

夜泛西湖二絕

蒼龍已沒牛斗橫
東方芒角昇長庚
漁人收筒及未曉
船過惟有菰蒲聲

湖上禁漁皆
盜釣者也

湖光非鬼亦非仙
風恬浪靜光滿川
須臾兩兩入寺去
就視不見空茫然

監試呈諸試官

我本山中人寒苦盜寸廩文詞雖少作勉強非天稟既
得旋廢忘懶惰今十稔麻衣如再著墨水真可飲每聞
科詔下白汗如流瀋此邦東南會多士敢題品芻蕘盡
蘭蓀香不數葵荏貧家見珠貝眩晃自難審緬懷嘉祐
初文格變已甚千金碎全璧百衲收寸錦調和椒桂醞
咀嚼沙礫礮廣眉成半額學步歸蹕蹠維時老宗伯氣
壓羣兒凜蛟龍不世出魚鮪初驚滄至音久乃信知味
猶食堪至今天下士微管幾左衽謂當千載後石室祠

高朕爾來又一變此學初誰論權衡破舊法芻豢笑凡
飪高言追衛樂篆刻鄙曹沈先生周孔出弟子淵騫寢
却顧老鈍軀頑朴謝鐫鋟諸君況才傑容我懶且噤聊
欲廢書眠秋濤誼午枕

望海樓晚景二絕

海上濤頭一線來樓前相顧雪成堆從今潮上君須上
更看銀山二十回

青山斷處塔層層隔岸人家喚欲應江上秋風晚來急

為傳鐘鼓到西興

試院煎茶

蟹眼已過魚眼生
颼颼欲作松風鳴
蒙茸出磨細珠落
眩轉遶甌飛雪輕
銀瓶瀉湯誇第二
未識古人煎水意
古語云煎水不煎茶君不見昔時李生好客手自煎
貴從活火發

新泉又不見
今時潞公煎茶學西蜀
定州花瓷琢紅玉
我今貧病長苦飢
分無玉盃捧蛾眉
且學公家作茗飲
塲爐石銚行相隨
不用撐腸拄腹文字五千卷
但願一

甌常及睡足日高時

孫莘老求墨妙亭詩

蘭亭繭紙入昭陵世間遺迹猶龍騰顏公變法出新意
細筋入骨如秋鷹徐家父子亦秀絕字外出力中藏稜
嶧山傳刻典刑在千載筆法留陽冰杜陵評書貴瘦硬
此論未公吾不憑短長肥瘠各有態玉環飛燕誰敢憎
吳興太守真好古購買斷缺揮縑繒龜趺入坐螭隱壁
空齋畫靜聞登登奇蹤散出走吳越勝事傳說誇友朋

書來乞詩要自寫為把栗尾書谿藤後來視今猶視昔
過眼百世如風燈他年劉郎憶賀監還道同時須伏膺
是日宿水陸寺寄北山清順僧二首

草沒河隄雨暗村寺藏脩竹不知門拾薪煮藥憐僧病
掃地燒香淨客魂農事未休侵小雪佛燈初上報黃昏
年來漸識幽居味思與高人對榻論

長嫌鐘鼓聒湖山此境蕭條却自然乞食遶村真為飽
無言對客本非禪披榛覓路衝泥入洗足關門聽雨眠

遙想後身窮賈島夜寒應聳作詩肩

將之湖州戲贈莘老

餘杭自是山水窟仄聞吳興更清絕湖中橘林新著霜
溪上茗花正浮雪顧渚茶芽白於齒梅溪木瓜紅勝頰
吳兒繪縷薄欲飛未去先說饒涎垂亦知謝公到郡久
應怪杜牧尋春遲髻絲只好對禪榻湖亭不用張水嬉

鴉種麥行

霜林老鴉閒無用畦東拾麥畦西種畦西種得青猗猗

畦東已作牛毛稀，明年麥熟芒攢犁。農夫未食鴉先啄，徐行俛仰若自矜。鼓翅跳踉上牛角，憶昔舜耕歷山鳥為耘。如今老鴉種麥更辛勤，農夫羅拜鴉飛起，勸農使者來行水。

和致仕張郎中春晝

投絃歸來萬事輕，消磨未盡祇風情。舊因尊菜求長假，新為楊枝作短行。不禱自安緣壽骨，苦藏難沒是詩名。淺斟盃酒紅生頰，細琢歌詞穩稱聲。蝸殼卜居心自放。

蠅頭寫字眼能明
盛衰閱過君應笑
寵辱年來我亦平
跪履數從圯下老
逸書閒問濟南生
東風屈指無多日
祇恐先春鷓鴣鳴

冬至日獨遊吉祥寺

井底微陽回未回
蕭蕭寒雨濕枯荻
何人更似蘇夫子
不是花時肯獨來

吳中田婦歎

和賈
收韻

今年粳稻熟苦遲
庶見霜風來幾時
霜風來時雨如瀉

杞頭出茵鎌生衣眼枯淚盡雨不盡忍見黃穗卧青泥
茆苫一月壠上宿天晴獲稻隨車歸汗流肩頰載入市
價賤乞與如糠粃賣牛納稅拆屋炊慮淺不及明年飢
官今要錢不要米西北萬里招羌兒龔黃滿朝人更苦
不如却作河伯婦

遊道場山何山

道場山頂何山麓上徹雲峰下幽谷我從山水窟中來
尚愛此山看不足陂湖行盡白漫漫青山忽作龍蛇盤

山高無風松自響誤認石齒號驚湍山僧不放山泉出
屋底清池照瑤席階前合抱香入雲月裏仙人親手植
出山回望翠雲鬟碧瓦朱欄縹緲間白水田頭問行路
小溪深處是何山高入讀書夜達旦至今山鶴鳴夜半
我今廢學不歸山山中對酒空三歎

贈莘老

嗟余與子久離羣耳冷心灰百不聞若對青山談世事
當須舉白便浮君

天目山前綠浸裾，碧瀾堂下看銜鱸。
作隄捍水非吾事，閒送苔溪入太湖。

夜來雨洗碧巒岈，浪湧雲屯遶郭寒。
聞有弁山何處是，為君四面竟來看。

夜橋燈火照溪明，欲放扁舟取次行。
暫借官奴遣吹笛，明朝新月到三更。

三年京國厭藜蒿，長羨淮魚壓楚糟。
今日駱駝橋下泊，恣看脩網出銀刀。

秀州報本禪院鄉僧文長老方丈

萬里家山一夢中
吳音漸已變兒童
每逢蜀叟談終日
便覺峨眉翠掃空
師已忘言真有道
我除搜句百無功
明年采藥天台去
更欲題詩滿浙東

宋叔達家聽琵琶

數絃已品龍香撥
半面猶遮鳳尾槽
新曲翻從玉連瑣
舊聲終愛鬱輪袍
夢回只記歸舟字
賦罷雙垂紫錦絛
何異烏孫送公主
碧天無際雁行高

法惠寺橫翠閣

朝見吳山橫暮見吳山縱吳山故多態轉側為君容幽
人起朱閣空洞更無物惟有千步岡東西作簾額春來
故國歸無期人言悲秋春更悲已泛平湖思濯錦更看
橫翠憶峨眉瑤欄能得幾時好不獨憑欄人易老百年
興廢更堪哀懸知草莽化池臺游人尋我舊游處但覓
吳山橫處來

有以官法酒見餉者因用前韻求述古為移厨飲

湖上

喜逢門外白衣人，欲膾湖中赤玉鱗。
遊舫已粧吳榜穩，舞衫初試越羅新。
欲將魚釣追黃帽，未要靴刀抹絳巾。
芳意十分強半在，為君先踏水邊春。

飲湖上初晴後雨二首

朝曦迎客豔重岡，晚雨留人入醉鄉。
此意自佳君不會

一盃當屬水仙王

湖上有水仙王廟

水光潑灩晴方好，山色空濛雨亦奇。
欲把西湖比西子

淡粧濃抹總相宜

風水洞和李節推

風轉鳴空穴，泉幽瀉石門。
虛心聞地籟，妄意覓桃源。
過客詩難好，居僧語不繁。
歸緝得冰雪，清冷慰文園。

新城道中

東風知我欲山行，吹斷簷間積雨聲。
嶺上晴雲披絮帽，樹頭初日挂銅鉦。
野桃含笑竹籬短，溪柳自搖沙水清。
西崦人家應最樂，煮芹燒笋餉春耕。

山村

煙雨濛濛雞犬聲有生何處不安生
但教黃犢無人佩
布穀何勞也勸耕

老翁七十自腰鎌慙愧春山筍蕨甜
豈是聞韶解忘味
爾來三月食無鹽

杖藜裹飯去匆匆過眼青錢轉手空
贏得兒童語音好
一年強半在城中

贈別

青鳥銜巾久欲飛黃鸞別主更悲啼慙慙莫忘分攜處
湖水東邊鳳嶺西

於潛女

青裙縞袂於潛女兩足如霜不穿屨
簷沙髻髮絲穿杼蓬沓障前走風雨
老漚宮粧傳父祖至今遺民悲故主
苕溪楊柳初飛絮照溪畫眉渡溪去
逢郎樵歸相媚嫵不信姬姜有齊魯

僧清順新作垂雲亭

江山雖有餘亭榭苦難穩登臨不得要萬象各偃蹇惜
哉垂雲軒此地得何晚天功爭向背詩眼巧增損路窮
朱欄出山破石壁狠海門浸坤軸湖尾抱雲巘葱葱城
郭麗淡淡煙村遠紛紛鳥鵲去一一漁樵返雄觀快新
獲微景收昔遁道人真古人嘯吟慕嵇阮空齋卧蒲褐
芒屨每自捆天憐詩人窮乞與供詩本我詩久不作荒
澁旋鋤壑從君覓佳句咀嚼廢朝飯

會客有美堂周邠長官與數僧同泛湖往北山湖

中聞堂上歌笑聲以詩見寄因和

載酒無人過子雲
掩關晝卧客書裙
歌喉不共聽珠貫
醉面何因作纈紋
僧侶且陪香火社
詩壇欲斂鸛鵝軍
憑君徧遶湖邊寺
漲淥晴來已十分

追和子由去歲試舉人洛下所寄詩
暴雨初晴樓上晚景

秋後風光雨後山
滿城流水碧潺潺
煙雲好處無多子
及取昏鴉未到間

洛邑從來天地中，嵩高蒼翠北邙紅。
風流耆舊消磨盡，

只有青山對病翁。

謂富公也。

白汗翻漿午景前，雨餘風物便蕭然。
應須半熟鵝黃酒，照見新晴水碧天。

病中遊祖塔院

紫李黃瓜村路香，烏紗白葛道衣涼。
閉門野寺松陰轉，欹枕風軒客夢長。
因病得閒殊不惡，安心是藥更無方。
道人不惜階前水，借與菀樽自在嘗。

與述古自有美堂乘月夜歸

娟娟雲月稍侵軒
潏潏星河半隱山
魚鑰未收清夜永
鳳簫猶在翠微間
淒風瑟縮經絃柱
香霧淒迷着髻鬟
共喜使君能鼓樂
萬人爭看火城還

八月十五日看潮

萬人鼓噪懾吳儂
猶似浮江老阿童
欲識潮頭高幾許
越山渾在浪花中

宿九仙山

九仙謂左元放
許邁王謝之流

風流王謝古仙真一去空山五百春
玉室金堂餘漢士
桃花流水失秦人
困眠一榻香凝帳
夢遶千巖冷逼身
夜半老僧呼客起
雲峰缺處湧冰輪

初自逕山歸述古召飲介亭以病先起

西風初作十分涼
喜見新橙透甲香
遲暮賞心驚節物
登臨病眼怯秋光
慣眠處士雲庵裏
倦醉佳人錦瑟旁
猶有夢迴清興在
卧聞歸路樂聲長

九日尋臻閣梨遂泛小舟至勲師院

湖上青山翠作堆
葱葱鬱鬱氣佳哉
笙歌叢裏抽身出
雲水光中洗眼來
白足赤髭迎我笑
拒霜黃菊為誰開
明年桑苧前茶處
憶著衰翁首重迴

皎然有九日與陸羽煎茶詩羽自號

桑苧翁余來年九日去此久矣

次韻述古過周長官夜飲

二更鏡鼓動諸鄰
百首新詩間八珍
已遣亂蛙成兩部
更邀明月作三人
雲煙湖寺家家境
燈火沙河夜夜春
曷不勸公勤秉燭
老來光景似奔輪

述古以詩見責屢不赴會復次前韻

我生孤癖本無鄰老病年來益自珍肯對紅裙辭白酒
但愁新進笑陳人北山怨鶴休驚夜南畝巾車欲及春
多謝清詩屢推轂豨膏那解轉方輪

來詩有雲霄蒲輪之句

書雙竹湛師房

暮鼓朝鐘自擊撞閉門孤枕對殘缸白灰旋撥通紅火
卧聽蕭蕭雪打窓

和錢安道寄惠建茶

我官于南今幾時嘗盡溪茶與山茗胸中似記故人面
口不能言心自省為君細說我未暇試評其畧差可聽
建溪所產雖不同一天與君子性森然可愛不可慢
骨清肉膩和且正雪花雨脚何足道啜過始知真味永
縱復苦硬終可錄汲黯少慙寬饒猛草茶無賴空有名
高者妖邪次頑憤體輕雖復強浮泛性滯偏工嘔酸冷
其間絕品豈不佳張禹縱賢非骨鯁葵花玉鞞不易致
道路幽嶮隔雲嶺誰知使者來自西開緘磊落收百餅

嗅香嚼味本非別透紙自覺光炯炯
粃糠團鳳友小龍
奴隸日注臣雙井收藏愛惜待佳客
不敢包裹鑽權倖
此詩有味君勿傳空使時人怒生癭

和柳子玉喜雪次韻仍呈述古

詩翁愛酒長如渴餅盡欲沽囊已竭
燈青火冷不成眠
一夜撚鬚吟喜雪詩成就我覓歡處
我窮正與君髣髴
曷不走投陳孟公有酒醉君仍飽德
瓊瑤欲盡天應惜
更遣清光續殘月安得佳人擢素手
笑捧玉盃兩奇絕

金
卷二十
豔歌一曲迴陽春坐使高堂生暖熱

夜至永樂文長老院文時卧病退院

愁聞巴叟卧荒村來打三更月下門往事過年如昨日
此生未死得重論老非懷土情相得病不開堂道益尊
惟有孤栖舊時鶴舉頭見客似長言

除夜野宿常州城外二首

行歌野哭兩堪悲遠火低星漸向微病眼不眠非守歲
鄉音無伴苦思歸重衾脚冷知霜重新沐頭輕感髮稀

多謝殘燈不嫌客孤舟一夜許相依

南來三見歲云徂直恐終身走道塗老去怕看新曆日
退歸擬學舊桃符煙花已作青春意霜雪偏尋病客鬚
但把窮愁博長健不辭最後飲屠酥

常潤道中有懷錢塘寄述古

草長江南鷺亂飛年來事事與心違
花開後院還空落燕入華堂怪未歸
世上功名何日是樽前點檢幾人非

去年柳絮飛時節記得金籠放雪衣

杭人以放鷓為太守壽

浮玉山頭日日風

即金山也

湧金門外已春融
二年魚鳥渾

相識三月鶯花付與公
刺看新翻眉倒暈未應泣別臉
消紅何人織得相思字寄與江邊北向鴻

惠泉山下土如濡
陽羨溪頭米勝珠
賣劔買牛吾欲老
殺雞為黍子來無
地偏不信容高蓋
俗儉真堪着腐儒
莫怪江南苦留滯
經營身計一生迂

遊鶴林招隱二首

郊原雨初霽
春物有餘妍
古寺滿脩竹
深林聞杜鵑
睡

餘柳花墮目眩山櫻然西窓有病客危坐看香煙
行歌白雲嶺坐咏脩竹林風輕花自落日薄山半陰澗
草誰復識聞香杳難尋時見城市人幽居惜未深

次韻沈長官

造物知吾久念歸似憐衰病不相違風來震澤帆初飽
雨入松江水漸肥

過永樂文長老已卒

初驚鶴瘦不可識旋覺雲歸無處尋三過門間老病死

一彈指頃去來今存亡慣見渾無淚鄉井難忘尚有心
欲向錢塘訪圓澤葛洪川畔待秋深

捕蝗至浮雲嶺山行疲苦有懷子由弟

霜風漸欲作重陽熠熠溪邊野菊黃久廢山行疲犂确
尚能村醉舞淋浪獨眠林下夢魂好回首人間憂患長
殺馬毀車從此逝子來何處問行藏

與毛令方尉遊西菩提寺二首

推擠不去已三年魚鳥依然笑我頑人未放歸江北路

天教看盡浙西山尚書清節衣冠後處士風流水石間
一笑相逢那易得數詩狂語不須刪

路轉山腰足未移水清石瘦便能奇白雲自占東西嶺
明月誰分上下池黑黍黃粱初熟後朱柑綠橘半甜時
人生此樂須天賦莫遣兒曹取次知

雪夜書北臺壁二首

黃昏猶作雨纖纖夜靜無風勢轉嚴但覺衾裯如潑水
不知庭院已堆鹽五更曉色來書幌半夜寒聲落畫簷

試掃北臺看馬耳未隨埋沒有雙尖

城頭初日始翻鴉陌上晴泥已沒車凍合玉樓寒起粟
光搖銀海眩生花遺蝗入地應千尺宿麥連雲有幾家
老病自嗟詩力退空吟冰柱憶劉義

謝人見和前篇二首

已分酒盃欺淺懦敢將詩律鬪深嚴漁蓑句好應須畫
柳絮才高不道鹽敗屨尚存東郭足飛花又舞謫仙簷
書生事業真堪笑忍凍孤吟筆退尖

九陌淒風戰齒牙銀杯逐馬帶隨車也知不作堅牢玉
無奈能開頃刻花得酒強歡愁底事閉門高卧定誰家
臺前日暖君須愛水下寒魚漸可叉

遊廬山次韻章傳道

塵容已似服轅駒野性猶同縱壑魚出入巖巒千仞表
較量筋力十年初雖無窈窕驅前馬還有鴟夷挂後車
莫笑吟詩淡生活當令阿買為君書

惜花

吉祥寺中錦千堆

錢塘花最盛處

前年賞花真盛哉道人勸我

清明來腰鼓百面如春雷打徹涼州花自開沙河塘上
插花回醉倒不覺吳兒咍豈知如今雙鬢摧城西古寺
沒蒿萊有僧閉門手自栽千枝萬葉巧剪裁就中一叢
何所似馬腦盤盛金縷杯而我食菜方清齋對花不飲
花應猜夜來雨雹如李梅紅殘綠暗吁可哀

送春

和子由

夢裏青春可得追欲將詩句絆餘暉酒闌病客惟思睡

蜜熟黃蜂亦懶飛，芍藥櫻桃俱掃地。
病過此鬢絲禪榻

兩忘機，憑君借取法界觀。一洗人間萬事非。
來書云近看此書余

未嘗見也

孔長源挽詞

小堰門頭柳繫船，吳山堂上月侵筵。潮聲夜半千巖響，

詩句明朝萬口傳。
長源自越過杭夜飲有美堂上聯句長源詩云天目遠隨雙鳳落海門遙

感兩潮趨一坐稱善豈意日斜庚子後，忽驚歲在己辰年。佳城一

閉無窮事，南望題詩淚灑牋。

懷西湖寄晁美叔同年

西湖天下景遊者無愚賢深淺隨所得誰能識其全嗟
我本狂直早為世所捐獨專山水樂付與寧非天三百
六十寺幽尋遂窮年所至得其妙心知口難傳至今清
夜夢耳目餘芳鮮君持使者節風采爍雲煙清流與碧
巖安肯為君妍胡不屏騎從暫借僧榻眠讀我壁間詩
清涼洗煩煎策杖無道路直造意所便應逢古漁父葦
間自負緣問道若有得買魚勿論錢

和蔣夔寄茶

我生百事常隨緣四方水陸無不便扁舟渡江適吳越
三年飲食窮芳鮮金齏玉膾飯炊雪海螯江柱初脫泉
臨風飽食甘寢罷一甌花乳浮輕圓自從捨舟入東武
沃野便到桑麻川翦毛胡羊大如馬誰記鹿角腥盤筵
廚中蒸粟埋飯甕大杓更取酸生涎柘羅銅碾棄不用
脂麻白土須盆研故人猶作舊眼看謂我好尚如當年
沙溪北苑強分別水脚一線爭誰先清詩兩幅寄千里

紫金百餅費萬錢吟哦烹噍兩奇絕只恐偷乞煩封纏
老妻稚子不知愛一半已入薑鹽煎人生所遇無不可
南北嗜好知誰賢死生禍福久不擇更論甘苦爭蚩妍
知君窮旅不自釋因詩寄謝聊相鐫

次韻周邠寄雁蕩山園

西湖三載與君同馬入塵埃鶴入籠東海獨來看出日
石橋先去踏長虹遙知別後添華髮時向樽前說病翁
所恨蜀山君未見他年攜手醉郫筒

送碧香酒與趙明叔教授

聞君有婦賢且廉勸君慎勿為楚相不羨紫駝分御食
自遣赤脚沽村釀嗟君老狂不知愧更吟醜婦惡嘲謗
諸生聞語定失笑冬暖號寒卧無帳碧香近出帝子家
鵝兒破殼酥流盎不學劉伶獨自飲一壺往助齊眉餉
趙既見和復次韻答之

長安小吏天所放日夜歌呼和丞相豈知後世有阿瞞
曹公自言北海樽前捉私釀先生未出禁酒國詩語孤
參之後

高常近謗幾回無酒欲沽君却畏有司書簿帳

近制公使酒過

數法甚重

酸寒可笑分一斗日飲亡何足袁盎更將險語壓

衰翁只恐自是臺無餉

趙郎中往莒縣逾月而歸復以一壺遺之仍用原

韻

東鄰主人遊不歸悲歌夜夜聞春相門前人鬧馬嘶急
一家喜氣如春釀王事何曾怨獨賢室人豈忍交謫謗
大兒踉蹌越門限小兒咿啞語繡帳定教舞袖掣伊涼

更想夜庖鳴鑿盜題詩送酒君勿謂免使退之嘲一餉
劉貢父見余歌詞數首以詩見戲聊次其韻

十載漂然未可期那堪重作看花詩門前惡語誰傳去
醉後狂歌自不知刺舌君今猶未戒炙眉我亦更何辭
相從痛飲無餘事正是春容最好時

次韻子由送蔣夔赴代州學官

功利爭先變法初典刑獨守老成餘窮人未信詩能爾
倚市懸知繡不如代北諸生漸狂簡牀頭雜說為爬梳

歸來問雁吾何敢疾世王符解著書

和李邦直沂山祈雨有應

高田生黃埃下田生蒼耳蒼耳亦已無更問麥有幾蛟
龍睡足亦解慙二麥枯時雨如洗不知雨從何處來但
聞呂梁百步聲如雷試上城南望城北際天菽粟青成
堆飢火燒腸作牛吼不知待得秋成否半年不雨坐龍
慵共怨天公不怨龍今朝一雨聊自贖龍神社鬼各言
功無功日盜太倉穀嗟我與龍同此責勸農使者不汝

容因君作詩先自劾

宿州次韻劉涇

我欲歸休瑟漸希舞雩何日着春衣多情白髮三千丈
無用蒼皮四十圍晚覺文章真小技早知富貴有危機
為君垂涕君知否千古華亭鶴自飛

涇之兄汴亦有文死矣

次韻答邦直子由二首

簿書顛倒夢魂間知我疎慵肯見原閒作閉門僧舍冷
病聞吹枕海濤喧忘懷杯酒逢人共引睡文書信手翻

欲吐狂言喙三尺怕君瞋我却須吞

邦直屢以此見戒

君雖為我此遲留別後淒涼我已憂不見便同千里遠
退歸終作十年遊恨無揚子一區宅懶卧元龍百尺樓
聞道鶴鴻滿臺閣網羅應不到沙鷗

中秋月

暮雲收盡溢清寒銀漢無聲轉玉盤此生此夜不長好
明月明年何處看

韓幹馬十四疋

二馬並驅攢八蹄二馬宛頸駿尾齊一馬任前雙舉後
一馬却避長鳴嘶老髯奚官騎且顧前身作馬通馬語
後有八足飲且行微流赴吻若有聲前者既濟出林鶴
後者欲涉鶴俛啄最後一匹馬中龍不嘶不動尾搖風
韓生畫馬真是馬蘇子作詩如見畫世無伯樂亦無韓
此詩此畫誰當看

哭刁景純

讀書想前輩每恨生不早紛紛少年場猶得見此老此

老如松栢不受霜雪槁直從毫末中自養到合抱宏材
乏近用千歲自枯倒文章餘正始風節貫華皓平生為
人耳自為薄如縞是非雖難齊反覆看愈好前年旅吳
越把酒慶壽考扣門無晨夜百過迹未掃但知從德公
未省厭丘嫂別時公八十後會知難保昨日故人書連
年喪公媪景純妻先亡傷心范橋水漾漾舞寒藻華堂不見
人瘦馬空戀阜我欲江東去匏樽酌行潦鏡湖無賀監
慟哭稽山道忍見萬松岡荒池沒秋草

答呂梁仲屯田

亂山合沓圍彭門官居獨在懸水村

呂梁地名

居民蕭條雜

麋鹿小市冷落無雞豚黃河西來初不覺但訝清泗流
奔渾夜聞沙岸鳴壘盡曉看雪浪浮鵬鷗呂梁自古喉
吻地萬頃一抹何由吞坐觀入市卷閭井吏民走盡餘
王尊計窮路斷欲安適吟詩破屋愁鳶蹲歲寒霜重水
歸壑但見屋瓦留沙痕入城相對如夢寐我亦僅免為
魚龍旋呼歌舞雜詼笑不惜飲釀空餅盆念君官舍冰

雪冷新詩美酒聊相溫人生如寄何不樂任使絳螭燒
黃昏宣房未築淮泗滿故道堙滅瘡痕存明年勞苦應
更甚我當畚鍤先黥髡付君萬指伐頑石千鎚雷動蒼
山根高城如鐵洪口決談笑却掃看崩奔農夫掉臂免
狼顧秋穀布野如雲屯還須更置軟脚酒為君擊鼓行
金樽

春菜

蔓菁宿根已生葉韭牙戴土拳如蕨爛蒸香薺白魚肥

碎點青蒿涼餅滑宿酒初消春睡起細履幽畦掇芳辣
茵陳甘菊不負渠鱠縷堆盤纖手抹北方苦寒今未已
雪底菠薐如鐵甲豈如吾蜀富冬蔬霜葉露芽寒更茁
久拋菘葛猶細事苦筍江豚那忍說明年投劾徑須歸
莫待齒搖并髮脫

讀孟郊詩二首

夜讀孟郊詩細字如牛毛寒燈照昏花佳處時一遭孤
芳擢荒穢苦語餘詩騷水清石鑿鑿湍激不受篙初如

食小魚所得不償勞又似煮彭蠡竟日嚼空螯要當鬪
僧清未足當韓豪人生如朝露日夜火消膏何苦將兩
耳聽此寒蟲號不如且置之飲我玉卮醪

我憎孟郊詩復作孟郊語飢腸自鳴喚空壁轉飢鼠詩
從肺腑出出輒愁肺腑有如黃河魚出膏以自煮尚愛
銅斗歌鄙俚頗近古桃弓射鴨罷獨速短蓑舞不憂踏
船翻踏浪不踏土吳姬霜雪白赤脚浣白紵嫁與踏浪
兒不識離別苦歌君江湖曲感我長羈旅

約公擇飲是日大風

先生生長匡廬山山中讀書三十年舊聞飲水師顏淵
不知治劇乃所便偷兒夜探赤白丸奮髯忽逢朱子元
半年羣盜誅七百誰信家書藏九千春風無事秋月閒
紅粧執樂豪且妍紫衫玉帶兩部全琵琶一抹四十絃
客來留飲不計錢齊人愛公如子產兒啼卧路呼不還
我慙山郡空留連牙兵部吏笑我寒邀公飲酒公無難
約束官奴買花鈿薰衣理髮夜不眠曉來顛風塵暗天

金史四九卷二十一
卷二十一
我思其由豈坐慳作詩愧謝公笑謹歸來瑟縮愈不安
要當啖公八百里豪氣一洗儒生酸

夜飲次韻畢推官

簿書叢裏過春風酒聖時時且復中紅燭照庭嘶驀裏
黃雞催曉唱玲瓏老來漸減金釵興醉後空驚玉筯工
月未上時應早散免教壑谷問吾公

續麗人行

李仲謀家有周昉畫背面欠伸內人極精戲作此詩

深宮無人春日長沈香亭北百花香美人睡起薄梳洗
燕舞鶯啼空斷腸畫工欲畫無窮意背立東風初破睡
若教回首却嫣然陽城下蔡俱風靡杜陵飢客眼長寒
蹇驢破帽隨金鞍隔花臨水時一見只許腰支背後看
心醉歸來茆屋底方信人間有西子君不見孟光舉案
與眉齊何曾背面傷春啼

游張山人園


壁間一軸煙蘿子盆裏千枝錦被堆慣與先生為酒伴

不嫌刺史亦顏開
纖纖入麥黃
花亂颯颯催
詩白雨來
聞道君家好
井水歸軒
乞得滿
餅回

攜妓樂游張山人園

大杏金黃小麥熟
墮巢乳鵲拳
新竹故將俗物惱
幽人
細馬紅粧滿山谷
提壺勸酒意
雖重杜鵑催
歸聲更速
酒闌人散却
關門寂
歷斜陽挂
疎木

宋詩鈔卷二十



總校官庶吉士臣張能照
校對官庶吉士臣陳文樞
謄錄監生臣周學澐